



Anotusi:

- Tatala le OFAGA Falemata'aga NUS Le Papaigalagala
- Molimau matua e te'ena le fa'aaoga o fanau su'e ai tupe
- E manatua Frank Solomon ulua'i Olopeleki Samoa
- Paso Samoa malo \$100
- Faasoa: E le utufia le uaina fou i fagupa'u tuai



ASO O FAITOTO'A MATALA MA LE AGANUU: E taua leni aso i le kalena a le NUS e feiloa'i ai ma fanau o loo sauniuni e ulufale mai i le 2025. Ua togia faatasi ma le faailogaina e le a'oga o le Aganuu, e iai tapenaga lelei saunia sa alo i ai saofa'iga taitasi i le vaiaso na se'i tuana'i. I luga le ata o Susuga mai le Saofa'iga Saienisi, ma tama ma teine mai le laumua, Wesley College, i Faleula. Fai ma sui o le faitau selau talavou a'oga sa auai.

TALA A'OGA O LOU LOTOIFALE:

O le a'oga e to'atolu tamaiti ae to'alua faia'oga

Tusia Salā Dr Saili Aukuso

O le fesili pe to'afia le numera o se vasega ona ta'u lea o le vasega e ono faapea, a maua lava le lua ua ta'u o le vasega. Se'ia vagana ua na o le to'atasi ona le tataua lea o le ta'u, vasega.

E to'atolu le vasega leni, to'alua tama ae tasi le teine. E iai le faia'oga ma le faia'oga lagolago. E lei se falea'oga, e fai lava i le fale o le faia'oga.

E tasi le aso a'oga, o le Aso Toona'i i le afiafi, a le avanoa le faia'oga ona fai lea i le afiafi o le Aso Sa. O isi foi taimi e mafua ona le faia se a'oga ona ua le avanoa tamaiti a'oga. E lei se taimi faatapulaa o le umi o le a'oga, a umi, poo le lua itula.

O le tala i le faavaeina o le a'oga e mai le talosaga a se tasi o matua, e fia maua se fesoasoani mo lana tama, ma amata ai loa le vasega i se taimi o Ianuari, 2024.

E to'aono tamaiti na amata ai, ae na sui le numera ina ua sui le nuu o nisi o le fanau, e nonofo ai, tula'i mai ai le numera i le tolu.

Sa lei faigata ona iloa mana'oga o le vasega; o tomai faavae i le literasi (literacy) e ao ona faamautu, ia latou leo ma faailoga mata'itusi. Sa iloa ai foi le tulaga o le pa'u maulalo o le sipela ma le faitau e fua i le matua o tausaga faitau. O le mea lea na toe foi ai e faamausali nei vaega amata ae taua.



Prince Paul Si'i Laponi, Sala Dr Saili (Faia'oga), Silvia Talifilemu, Felise Paul Vailua i la latou ata muamua

E ave le faamuamua i le gagana muamua a le fanau, poo le gagana i le fale.

E molimau lava matua i suiga ua tula'i mai ia latou ausiga i a'oga, ma e talitonu foi i latou o lena suiga e mafua i leni fesoasoani fa'aopoopo i tua o le a'oga. E molimau ripoti mai le a'oga i na suiga lelei.

Mo faia'oga, o se fe'au o le alofa leni e le totogia i ni tupe; o le tau e maua i le lotofiafia ona o le pulunaunau mai o i latou e peisea'i e tauanau le taimi e amata ai.

Ua iloa se mana'oga malosi mo ni vasega faapea i totonu o nuu ma aiga. Pei ona molimau tulaga o nei aso, i le ava na tu'ua ina ua le toe iai ni a'oga a faifeau. Ua le toe maua foi ni taimi o matua i le fale, ona o isi faauilavea e iai le bingo ma mea faapena.

O le miti mo se a'oga to'atele (i tua o itula a'oga) i Leauvaa, o loo afuafua malie i le mafaufau, ae mo le taimi nei, o loo manuia lava gasologa o le vasega to'atolu, fiafia fo'i matua ma faia'oga.

TALA A'OGA I LOU VAIFANUA:

Molimau matua lava ia e te'ena le fa'aaoga o fanau e su'e tupe ai

E fulisia le atunuu i le taofi e le tatau ona fa'aaoga fanau e saili tupe ai matua, aemaise i taimi o a'oga. O le faatatau lea pe a fua i le to'aiva na fesiligia ni o latou taofi i le amataga o lenei vaiaso.

Mai le to'asefulu o sui o le atunuu na tapa ni o latou taofi, e to'aiva na te'ena lea faiga, ae na o le to'atasi na lagolagoina. E to'alima matua, o tina e to'alua ma tamā e to'atolu. E to'alima fo'i fanau a'oga o teine e to'afa ma le alii e to'atasi.

O le finagalo o le toeaina matua o Mareko, 76 tausaga, e le o se mea tatau lea mea. E tatau ona o fanau i le a'oga, ma o lona faanoanoaga lea aua sa leai se mea faapea e tupu i lona taimi a o laitiiti.

"O le matou aiga e faatau fualaaou faisua ae se'i iloga lava o le Aso Toona'i ona faato'a ou fesoasoani lea i o'u matua i le faatauga. E le faatagaina a'u ou te nofo."

O se lagona foi lea o le tina ia Telesia Faamoe, 45 tausaga mai Fasito'otai. "E le talia lava e lo'u tagata sea faiga ma ou te lagolagoina le malo e ala i le Tulafono. E le o se mea e tatau ona tatou faamasani i ai ma e tatau lava ona taofi."

E faapena foi le tina ia Mary, 32 tausaga mai Nuufou, o lona popolega o le saogalemu o i latou nei. "E iai tamaiti pe na o le 5 i le 6 tausaga ua ou vaai i ai, ou te ofo lava i matua, aua e le iloa le mea e tupu, alu le tamaitiiti e taamilo ae na te le iloa atu le isi tulimanu."

O le susuga ia Weynor na te matua te'ena foi le fa'aaoga o fanau e saili tupe ai matua. "O a'u le isi tagata ou te alu lelei lava talanoa i matua ma fai i ai e le lelei la latou mea o loo fai. E iai lava matua e faamalie mai a o isi foi e fia mimisa.

Saunoa pea Weynor, "Na ou alu lelei lava i le isi aso lipoti i leoleo ni isi o fanau ou te iloa o latou matua. E nofonofo mai le isi itu o le taulaga ae feofeoa'i solo mai 'o tamaiti e faatau pulu ta'ele."

"E tupu lava i autafa i 'i, e tuu lelei lava la'u stall ae ou savalivali e talanoa i se tina, ma ave i ai se fautuaga. E le aoga lava ni tupe pe a tupu mai se faalavelave," saunoa Weynor.

Molimau Sio Leupope, mai Aleisa, o nisi o i latou nei ua fai ma faalavelave i tagata malaga mai fafo. "Ou te avea lava e a'u le faasea i matua aua o lo latou tiute lea ua faae'e i ua o fanau," saunoa Sio.

"Ana se mea e pei tatou o nisi o malo i fafo penei ua tatou faalogo i ni lipoti e le fia faalogo i ai, ae tatou te o'o lava i ai. Ua le toe saogalemu foi Samoa mo fanau. E iai le mea lea na tupu mai i se teineitiiti a'oga na ave faamalosi e se avetaavale, ma fai i ai ni faiga mataga, e le i leva atu."

Mai le autalavou na fesiligia e to'afa e matua lagolagoina le mau a matua. E le o se mea tatau. O le nofoaga o fanau o le a'oga ma le fale, ae le o le auala taavale.

"Na ou nofo mai le a'oga i le 12 o'u tausaga, o a'u le ulumatua a o'u matua ae o lo'u tamā e ma'i. Fai mai lea o lou tina ou te nofo ia e fesoasoani ia te ia i le tausiga o lo matou aiga. Ua atoa nei le 17 o'u tausaga o o'u faia lenei galuega . . . Soo se mea lava ou te alu e faatau, pe maua ai sa matou mea'ai o le aso. E ono aso o le vaiaso ou te feelua'i ai e faatau. I Vaitele e lata i lo matou aiga, ae sili lava Apia e toatele tagata."

Mikaele, 17 tausaga, tama faatau oloa savali



Ata taumatau: Tina e to'alua e tete'e: Mary Meki, mai Aleisa, ma Telesia Faamoe mai Fasito'otai.



Tausiiga: Sio Leupope mai Aleisa e tete'e



Teine a'oga: Peti Ioane e lagolago

O le tama a'oga mai Sagato Iosefo, na faailoa lona popolega i le tula'i mai o lenei aga e avea ma se masani.

Na ia fesiligia le tausiga o le Tulafono e foliga e le o faia e leoleo lo latou tiute.

Peita'i e to'atasi e 'auese lona taofi. O le tamaiti a'oga o Peti, mai le alalafaga o Leauvaa, a'oga i se tasi o kolisi i Apia, na te lagolagoina le faiga lea. Faapea mai Peti, "E mana'omia e nisi matua le fesoasoani 'ona o le mativa, e leai ni galuega ona pau lea o le auala e maua ai ni seleni e tausai ai. O nisi foi fanau e fia fesoasoani i o latou matua," saunoa Peti. Ae manatu foi Peti e tatau ona a'o'oga nei tamaiti. Ina ua toe tuliloa poo fea le itu e 'au i ai, o lana tali, o itu uma e lua.

O le faafitauli o fanau le a'o'oga ae o e faatau oloa i Apia ma tafaala, o se talanoaga o loo fa'aaauu pea.

Pau se matau a lenei tautua, ua faasolo ina laiti le 'aufaatau, 5 tausaga i luga. O i

latou nei e lei o i le a'oga ae ave e matua e fai faatau i luma o polotito o supamaketii poo fale'aiga. E nofonofo matua lata ane ma faatalitali tupe o ni faatau e maua e fanau. O oloa faatau e iai puluta'ele, afitusi, poo ni pepa faamanogi taavale.

E filo faatasi ma isi talavou matutua e tautua le mana'o o tagata fegasoloa'i. E tau lava i le 8 i le afiafi o amiomio i latou ma matua i nei nofoaga. Se'i vagana talavou matutua e masani ona sili atu i le 8 pe oo atu lava i le 10 i nofoaga e iai kalapu ma fale'aiga.

O lenei tama'i su'esu'ega, 10 tagata, e molimau i le iai o se faafitauli o loo tupu ma e ono avea ma masani, a o aga'i ina suia malie Samoa e supamaketii nei ua talafaauto atu i itumalo i tua, amata i Upolu, sosoo Salafai. E faamaonia foi i lenei sevei laitiiti, nisi o sailiga a nusipepa ma leitio, i le fulisia o le atunuu e te'ena le fa'aaoga faaletatau o fanau, e su'e tupe ai nisi o aiga.

TALA A’OGA LOTOIFALE:

Tatala le Ofaga o Sailiiliga mo le maimoaga a le atunuu

O le faaiuga o le masina na se’i mavae, 30 Aukuso, na faataunuu ai le faamoemoe, i le tatalaina o le falemata’aga a le lunivesite Aoao o Samoa, mo le maimoaina o lona ‘anofale e le mamalu o le atunuu.

E pei ona faamatala i se ripoti a le OLA na muamua, o lenei taunuuga e tauluga ai se faigapa’aga i le va o le falemata’aga Siamani, le Ubersee ma le lunivesite Aoao a Samoa. Na taufai malilie ai mo le faamatuuina mai o ni measina a Samoa sa teuina i lea fale i Bremen i Siamani.

Ma tapena ai loa le fale mata’aga (laitiiti) mo le teuina o nei oloa mo le maimoaina e le atunuu. O measina e aofia ai le ao o se tagavai tau o se vaa Samoa e iloga lona tala’aga. E faapena foi i isi measina e tofu ma ni tala, e taula’i uma i le taimi a o pulea Samoa e le malo o Siamani.

Na tatala le fale e le Afioga i le Sui Palemia, Hon. Tuala Ponifasio, sa auai le Faatonu o le Falemataaga Ubersee, Dr. Wiebke Arhndt, ae faapea le ma’ave eseese o Samoa i faiva eseese. Na ia faafetaia le malo o Siamani i lenei galuega taua e faaolaola ai pea sootaga o malo e lua, mai ananafi e o’o mai i le aso.

O se tasi lenei taulagalaga e ta’u ai le iunivesite a le atunuu, aemaise lona tulaga o se ta’imua i le galuega o le taofiofi ma faasaosao a tatou measina ma o latou tala’aga, auā tupulaga lalovaoa.

Ua avanoa nei le fale, Ofaga, mo asiasiga a le mamalu o le atunuu.

E mafai ona fesoota’i mai i le lunivesite mo ni faamatalaga e faatatau i ni su’esu’ega e fia faia faatatau i nei measina i totonu.



MOLIMAU E TO’AVALU: Aofia ai le Afioga a le Pule Sili, Tuifuisaa Prof. Patila Amosa, le Afioga a le Sui Palemia, Hon. Tuala Ponifasio, ma le Faatonu o le Ubersee, Dr. Wiebke Arhndt, sa molimauina le aso.




O ISI MOLIMAU mai le itu i ama: Dr. Brian Alofaituli (CSS), Dr. Wiebke Arhndt (Ubersee), Hon. Tuala Tevaga Ponifasio (malo Sui Palemia), Afioga Faamausili Tauave Galuvao (CSS), sa molimauina le tatalaina o le fale i lea aso. O le molimau sili i sootaga faalemalo ma faalea’oa’oga o le fale lava ia. Ata—NUS Website Facebook

CENTRE FOR SAMOAN STUDIES

National University of Samoa

E mitamita le Laumua o Mataupu Tau Samoa i lana faamuamua i le a’oa’oina, su’esu’eina ma faasoa atu fua o le malamalama ma le silafia ia Samoa.

CSS prides itself in its focus on matters pertaining to Samoa through teaching, researching and publishing to promote knowledge and understanding of Samoa.




IA AO SAMOA


EVALEON BOOKS NIUPAC PUBLISHING

Telefoni 7796213 e-meli: evaleon.books@gmail.com


Tautua e ala i le gaosia o alaga’oa mo a’oga (tusi mo le a’oa’oina o le faitau i le gagana Samoa, tusi e a’oa’o ai gagana, kalena, posters, yearbooks, brochures). E tautua fo’i i le fa’aliliuga o gagana, ma le tapenaina o ni tusi e fia lomina i so’o se sionara o fatuga.




Saili Aukuso



TAVITA & AUKUSO
evaleon resource



TAVITA & AUKUSO
evaleon resource



L. TAVITA, S. AUKUSO

Faasoa o le Vaiaso: Dr Levi Tavita

E taua le puipuiga a le tulafono i aia tatau a le fanau—ae e le 'o lava

I le tausaga e 2019 na faalauiloa ai le faiga faavae a le malo i le tausiga ma le puipuiga malu o fanau.

O lena faiga faavae e afua mai i le 2020 e aulia le 2030 lona faamamaluga. Sa taulamua le matagaluega o Tina ma Tamaitai i le tuufaatasiga o lea pepa. Ma o se galuega e lei faatafulu ona fai, e molimau lava le galuega ia, i itula e tele o su'esu'ega sa faia ma taimi sa alu i lona tuufaatasiga.

I le upu tomua na saunoa ai le Minisita, Dr Tuitama e momoli le fe'au taua, o fanau o lo tatou tofi mai le Atua e ao ona puipui malu mai soo se faiga e afaina ai i latou. Na ta'utino foi e le Minisita le faamaoni o mea ua tutupu ma afaina ai le fanau, ma faailoa foi lona faanoanoaga i le vaivai o la tatou tali atu i ai.

O lana folafolaga, e maua le fofo i le galulue faatasi, e pei ona iloa ai Samoa o se nuu. E taua le faauilavea i se taimi vave, ma na ia folafola foi le auala e taimua ai le malo i le tuufaatasia o nei uma pulega ma malosiaga ina ia iloga se puipuiga o fanau.

I tua atu o lenei galuega isi ripoti faavaomalo e tusilima i le tulaga maualalo o le puipuiga o fanau i Samoa; e iai le ripoti a le ofisa o le Puluvaaga i le 2015, na tapena ma tuuina atu i luma o le palemene. O sea ripoti na saunia e tusa ma tuutuuga faavaomalo e noatia ai Samoa, tauala i pulega eseese a le lalolagi e iai le UNICEF ma isi.

O le 'au'au o talanoaga i lea taimi, o aia tatau a le fanau, ma o le upu moni, e le o se talanoaga faigofie. To'atele faipule ma matua foi, e lei fiafia i sea faaupuga poo se suiga foi e avatu ai i fanau le aia tatau. O popolega e malamalama lava i le faavaa o la tatou aganuu. Ona ua faamatuu atu le aia tatau ia i latou, ona le toe aoga lea o tapu sa faatonutonu ai le va nonofo. Ma o na suiga e tautonu lava i le a'a o pulega faaleaiga Samoa ma le faa-Samoa.

O le finau a i latou e lagolagoina le tulafono, e le o le aia tatau le 'autu, a o le puipuiga malu o i latou mai sauaga e afaina ai, ma e iai molimau e faamaonia ai le afaina. Muamua, o le limatete o nisi matua poo e foi e vaaia fanau, e aofia ai faia'oga. Lua, o solitulafono i le va o nisi matua ma a latou lava fanau, molia ai ni tamā i le pule le uma. Tolu, o molimau e faamaonia ai le fa'aaoga o i latou i auala e saili tupe ai ma tuua ai i latou i ni tulaga e lamatia ai o latou ola ma le saogalemu.

I le iuga o le talanoaga, na malo le finau e apoapo lena e maualafia ai le puipuiga ma le saogalemu o fanau. E taua le iai o le tulafono auā e le o Samoa uma e sauā pe amio faaletatau ia latou lava fanau.

La lea ua iai le tulafono, ua iai le faiga faavae, ua iai ma feagaiga faavaomalo i luga o na, e saga puipui malu ai i latou. Ae o le fesili, po'o malu faamaoni i latou pe leai?

O le tali o loo iina, o loo iinei, o loo i le malo, i pulega a nuu ma lotu foi. Auā o soo se faafitauli, e le malaese se to'atasi. Pei o le



muagagana, o le tama e faafailele to'atele e lona aiga, nuu ma tagata.

I le faafitauli o fanau e tumu ai polotito o faleoloa i Apia ma nuu tulata i ai, e le o iai ni foliga o le fai ifo, na o le fai a'e pea, e foliga e le o aogā le tulafono sa fai.

E iai tamaiti e sili ia i latou le nonofo ma le a'oga ae o e faatau oloa e fesoasoani i matua. E iai Mikaele, 17 tausaga, ua leva le nofo ma le a'oga e fesoasoani i le tausiga o le aiga. O lana galuega o le faatau pulutaele.

Pei foi ona tupu i nisi o fanau i Niu Sila, ua tuu a'oga ae o e faigaluega ona o le vaai alofa i matua. E le ona ua le fia a'o'oga, ae ona o le manatu i le tulaga mafatia o matua ma aiga.

I Samoa nei e le o fanau matutua a o le tinifu laiti, 5 i le 10 tausaga, e tausolomua. E nonofo mamao mai matua i se tulimanu ae tutuli fanau e faatau oloa ma foi mai pe a maua ni faatau. O popolega i lo latou saogalemu e le finauina, a o femioa'i i vai taavale i le pisi o itula faigaluega. E le tau auiliiliina lea vaega, ua faafia ona afea i ripoti a Nusipepa ma faasoa lautele.

O le uiga o le taofi, e le o le tulafono ma le aia tatau le fili, a o le mativa ma le faasoa lē tutusa a le tamao'aiga. E lagolagoina lava e ripoti sa ta'ua. E mautinoa e le o fanau uma o loo lamatia, e le o aiga uma o loo pagatia. Ae tainane pe na o se pasene faaleiloga e aafia, o tatou uma lava na.

I le 2021 na folafola ai e le Minisita o Leipa, Hon. Leatinuu, le sini a le malo e tineia soo se faiga e faafaigaluega ai tamaiti e lei aulia tausaga, e fia ausia lea i le 2025.

Toe o se tausaga ma ni masina o loo totoe ae o le molimau a se tasi tamā na fesiligia, e le taunuu sea folafolaga. Se'i vagana lava ua fai se fuafuaga a le malo i le mativa ma ona a'a. "Se'i le a'a," fai mai ai Fiamē," o le toe upu lea a le tama.

E aofia i lena le fegasoloa'i o aiga mai tua i totonu o le taulaga ma ona faoa aai. Avea ai le to'atele o na aiga o ni e faalagolago i lea galuega e soifua ai. Pe mafua lea ona o le le

lava o ni avanoa faigaluega i nuu i tua, pe ona ua leai ni eleele e aga'i i ai nei aiga?

Faamata 'ana taula'i tonu ni fesoasoani i nei aiga, pe le o le tali lea i le faafitauli? Pe le o le tasi lea aogā o le poloketi miliona a le malo, ina faaleleia ai le tulaga le tutusa o le faasoa tautupe mo aiga limavaivai?

Pe le o le uiga lea o se nuu Kerisiano, e fai le galuega fesoasoani i ona tagata o loo pito i lalo i le faatulagaga o mafaia?

Pe le ua tatau ona faitauina le 'mativa' o se tasi vaega i le faasoaga o lenei foa'i a le malo? Pe le ua tatau ona molia matua i le tulafono i le fa'aaoga sese o a latou fanau, ma tineia ai a latou aia tatau i se olaga a'oa'oina lelei?

E mafai lava ona fai o na mea uma, pe a iai se finagalo malosi faapolotiki, se fuafuaga tuutumamao e atoaina ai vaega uma o pulega, ae mo le taimi nei, e fia molia atu fanau i potua'oga, e fia maua e o latou aiga ni fesoasoani i le tausiga, e fia vaaia ni molimau o ni tulafono e fai ni o latou nifo. A leai, e le muta le faafitauli, pei ona ta'utino mai le tamā sa fesiligia.

E manatu le faasoa e le o se mea leaga le galulue o fanau, auā o le olaga lea ua tatou masani ai. Ae afai loa e una'ia i latou i le mana'o tupe, ona sui lea, ina ua faataua e i latou le tupe i lo le a'oga.

Faapena foi mo matua o i latou, ina ua faasili mana'oga e fa'aaoga ai tupe, i lo le tiute faamatua e ave fanau i le a'oga. Ae pei ona laga se faamanatu, e mana'omia e nei aiga le fesoasoani, ni fofo mautu i a'a o faafitauli ua mafua ai ona faapea. Fa'apena foi i isi vaega, e pei o le faasaua i fanau ma lamatia ai le ola. Tele mea tutupu e le o maua i ripoti, o se vaivaiga lea o le tulafono.

Fai mai le Tusi Lelei, e faasala le tulafono ae faaola le alofa tunoa. Tatou te fia molimau atili i ni fua o le alofa tunoa, ae le o ni isi tulafono i luga o isi.

UPU O LE POTO:

Afai o se faama'i le mativa, ua pisia ai le nuu atoa e ala i le leai o ni galuega, sauaga, a'oga e aunoa ni ausiga, aiga malepelepe, e le tatau la ona togafiti ta'itasi. E ao ona faamalolo le nuu atoa.

- Barack Obama, Peresitene

I soo se mataupu e aafia ai le amiotonu, e iai le sao o le mau faa-Kerisiano. Auā o le finagalo o Keriso ina ia faatonu e le fe'au a le satauro la tatou taulaga ma mea tatou te fai.

- Tui Atua Tupua Dr Efi

Ne'i Mea Ane ua Galo

Frank Solomon ulua'i Samoa ulufale i le Olopeleki a Niu Sila



Frank Solomon



David Solomon

LE fesiligia, o taleni ta'alo a alii ma tama'ita'i Samoa, o ulua'i avefu'a ia o le igoa Samoa ina ua malaga atu le atunuu e saili lumana'i i Niu Sila ma isi malo.

E lua taaloga na iloga ai, o le lakapi ma le faipelē. O le Olopeleki a Niu Sila o le sini e taula'i ma gata ai faamoemoega mo soo se tama lakapi, talu ona avea lea ma se igoa ta'uta'ua i le amataga o le 20 seneturi. O lenei le 'au'upega mata'utia a Niu Sila e ta'u atu ai i le lalolagi sona mafaia o se tama'i nuu o le Emepaea Tele a Peretania.

E lei faigofie le ulufale i ai. Muamua o le pa puipui o le faailogalanu. Ae na alu a'i suia malie, ina ua le toe 'alofia le tulagaese o taleni ta'alo a alii Maori, aemaise i le lakapi. Afai la sa faigata mo alii Maori, o lona uiga na sili ona faigata mo tama Pasefika na saili lumana'i atu i Niu Sila.

La lea ua na o e ua iai le taleni ma agavaa faapitoa—pe i le faa-Peretania le x-factor, e mafai ona ulufale.

O Frank Solomon sa fanau i Tutuila, ma o ia le ulua'i Samoa na ulufale i le Olopeleki i le 1931. Ae na muamua i lona lona avea ma se sui o le Olopeleki a Maori, ma faavae ai sona tulaga amana'ia, faapitoa i le taamilosaga o le 1927 a Maori ia Niu Sila.

E lei se isi na fesili poo se Maori pe leai. Na talia ma le fiafia lona ulufale e uso Maori. O sea mataupu na faato'a manu a'e a ua malolo o ia mai le taaloga.

E 8 ana taaloga mo le Olopeleki a Maori ae 3 mo Niu Sila—na maua ai sana sikoa. I le tasi o taaloga ma Ausetalia i le 1932 na ia ta'ita'ia ai le Haka. Na ta'a'alo faatasi ma le alii o Walter Batty, o se papalagi na fanau i Toga, ulufale i le Olopeleki i le 1928. O lana ulua'i taaloga, a o le taaloga mulimuli lona a Walter. O le ulua'i taaloga fo'i lea mo le lpu o le Bledisloe.

E tusa i ripoti, o ia o se tagata tino lelei ma le laulaua (6 futu, 14 maa), ae ma'eu le saosaoa, sa le i faigata ia Frank ona vavae le laina puipui a le isi itu, pe motu mamao i luma a o loo taotao mai



- ~ SET 1~17 ~**
- 1
1905 Ulua'i lomiga o le Savali nusipepa
 - 2
1879 Pulea Apia e se pulega tuto'atasi
 - 3
1939 Amata Taua Lonalua Lalolagi
 - 4
2010 Mafui'e Kalaiesetete, 1 maliu
 - 5
1888 Tu'i e le vaa SMS Adler motu o Manono ma Apolima
 - 6
1984 Talanoaga Samoa e lua tuufaatasi
 - 7
1866 Faamau a Ta'unga i faailoilo o se mafui'e tatanu a pa gatai o Olosega
 - 8
1976 Talimalo malo Saina i le ao o le malo Malietoa Tanumafili 2

- 10
1979 Piiga Maivia ma Harley Race i Apia
- 12
2009 Talimalo Samoa Kilikiti Lalolagi
- 13
1866 Pa i luga le maugamu tatanu i gatai o Ta'u ma Olosega
- 14
1982 Pasia tulafono o Sitiseni Samoa e le palemene a Niu Sila
- 15
1845 Ulua'i misasa Katoliko i Lealatele
- 16
1901 Vaoia e Kovana Sulusi le tu faa-Samoa o le faate'a ese mai le nuu
- 17
1887 Tuuina atu e Malietoa ia i le kapeteni Siamani Eugen Brandeis, avatua ai fa'aunuu i ni motu Pasefika



Ono futu le maualuga, 14 maa le mamafa, sa iloga Frank i tulaga e lua Numera 7 ma le 8.

tua le tuliga, pei ona molimau le ata. E talenia fo'i i le alovaa.

Na fesiligia e nisi le vave faamutaina o lana tautua i le Olopeleki. Ae na fa'aaauu lana tautua mo Aukilani e 54 ana taaloga, ma sosoo ai ma lona ulufale i le fitafita. Laga'i le Taua Lona Lua, na avea ai ma Satini Muamua, siitia i le Tulaga Lutena mulimuli ane.

I le 1935 na ulufale ai fo'i lona uso o David i le Olopeleki. Filifilia foi i le malaga taamilo a le Olopeleki i Peretania maua ai sana sikoa.

Mulimuli ane faamamalu i laua ma lona uso i ni suafa matai e o laua aiga i Samoa.

Na maliu Frank i lona aiga i Aukilani i le 1991, i lona 85; a o David ia Aukuso 15, 1997, i lona aiga i Aukilani, i lona 84.

Mai i le auuso Solomons na pasi atu ai le fu'a ia Bryan Williams, ina ua ulufale i le 'au a Niu Sila i le 1970.

Faapei foi o Frank, na iloga lona tula'i mai o se tama ta'alo talenia, i se taimi aupito vevesi o suiga faasaga i faiga faailogalanu i taaloga, aafia ai upufai o le malo Niu Sila atoaina le lalolagi.

UILI FAU UPU


Saili tali o fesili o lo'o i lalo. Pule oe pe sipela i luma (clockwise) po'o tua (anticlockwise).

E sa le feosoosofa'i.

1. Tusi mai uiga o le upu *mua*

2. Sa'ili ni upu/fuiupu se 5 e faai'u i le fasiupu *ata*

3. Su'e se upu e 9 mata'itusi ma tusi sona fa'amatalaga:



4. Tusi uma upu/ fuiupu e ta'i 3-9 mata'itusi, ma o latou soa i le Igilisi (E faitau ai ma upu ta'ua i le 1, 2 & 3)

Lelei atoa = 12 upu

Lelei tele = 8 upu

Lelei = 6 upu

PASO I GAGANA E LUA /2024-10

Faatumu avanoa i upu/igoa Peretania e soa tutusa ma upu Samoa (vaai Ftg.) **Fill crossword with English words/names or equivalents of Samoan**

1		2		3		4	U	5	P	6	O	N
						7						
8					9							
				10								
11							12			13		
							14	B	A			
15			16					17	18			19
			20					21				
	22											
23												24
25						26						

©LPSL TAVITA

Faalava ~ Across

- 1 lole (6)
- 4 i luga, i lena (4)
- 8 ta'u ai se tagata atamai tele i se tomai (4)
- 9 poto (6)
- 11 mamalu (6)
- 12 faaopoopo (4)
- 14 fpp. **Tikeri muamua lunivesite** (2)
- 15 Leai (2)
- 16 Aisea (3)
- 17 malaga (4)
- 22 laina umi matafaga (5,4)
- 25 mea faapipii (4)
- 26 motu 'amu (6)
- Lalo~Down

- 1 la susulu (8)
- 2 fe'au e momoli (6)
- 3 i, ia (2)
- 5 taavale: vae taofi, mnf (5)
- 6 o igoa (5)
- 7 nofo (3)
- 10 o tusitala (7)
- 12 pa'i (3)
- 13 fpp. lunivesite (3)
- 18 faatatau i fatuga'o o le tagata (5)
- 19 fpp. Taaloga a'oga (2)
- 20 faleoloa (4)
- 21 fasi fanua (4)
- 23 suinauna: o se mea ae le o se tagata (2)
- 24 tatou (2)

THE ALPHA BUILDER

Rules:

1. Build as many English words as possible, start with three letter words.
2. Every word you build must include the Alpha Letter (centre).
3. Each letter is used only once, including the Alpha Letter.
4. The class as individuals or groups can play this game. 1 point for one three letter word, 2 for four letter word, 3 for five, and so forth.



Three letter words

Four letter words

Six –seven letter words


ADDITIONAL ACTIVITY: Make a list of other words that are spelt without the Alpha Letter E.g. MAT, CALM

SUDOKU ~ TAALOGA I NUMERA (courtesy—sudoku.com)


	3		1		9	7		6
	5				4			9
			8	3		4	5	
	2		6	4	7			5
	7						6	1
8		5	3	2	1			4
				1		5		3
5	8			9			2	
	4	3	5		2	1		

~ TAALOGA PASO SAMOA I LE GAGANA SAMOA ~ POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. **Faailoga tupe \$100 poo tusi faitau a’oga** mo sē e mua’i faatumua le paso i lona sa’o atoatoa. (Tuutuuga: ia tuuina mai lau tali i totonu o le vaiaso mai le aso o le lomiga).
3. E leai se tasi na maua le faatulagaga sa’o o le paso Lomiga 10. E fa’aaau le taaloga.



73. Talatuu: le tasi o malae na tau ai Leatiogie (6)
78. faigata ona gagau (2)
79. Kalama: faailotaimi tuana’i (2)
80. se afioaga i Salafai (8)
81. O ai a’u? Sa ou taalo i le lakapi liki Ausetalia, taalo foi mo le Toa Samoa, o lou igoa muamua o Matthew (4)



84. leo: va _ vi, vo, vu (2)
85. to’alia (se isi upu tutusa) (6)
88. poto i le a’oga (6)
89. igoa o se pese Punialavaa (4,2,6,4)
93. Taumafataga: se mea lelei (4)
94. ave ese faafuase’i (5)
95. Talatuu: le laau na saisai ai le teine o Leutogitupa’itea (5)
96. Pese: E le o a’u o se ‘ai _ (6)

FAALAVA ~ ACROSS

1. Malo komunisi aupito malosi (5)
4. Faalupega tupu Peretania (10)
9. Talatuu: Tina o Tupuivao (6)
14. Se suafa taua i Tuana’i (11)
15. O ni manu’a pe a sasa le tino (11)
16. Muagagana: Ua pa le _? (3)
17. Talatuu: fale o se ulugalii (4,1,2,2,2)
18. ma isi ua le ta’ua (6)
19. fale o le tulafale (4)
20. foliga pe a pu’e (3)
23. aute e tu i le vao (7)
28. soso ese (3)
30. Tusi Paia: o le ulua’i tusi o le Feagaiga Fou (6)
32. faatoaga taumamao ma le aai (7)
33. faanoi mai se mea (2)
34. tautua (se isi upu tutusa) (8)
38. faapu le eleele i le suo (3)
39. se nuu i le atu Fagaloa (6)
40. ta’u ai faaulaula se alii (6)

43. se faiga e masani ai ni tagata (2)
44. Faauma fuaiupu: O le uila na _ (3,3,3)
45. se laina o laau (2)
46. E faatatau tonu i se tagata (6)
49. malo le aano (2)
53. e asu ai le mea’ai (3)
55. Upu: Ua _ o le aiga sa Tagaloa (3,3)
57. inosia (se isi upu uiga tutusa (6)
58. Upu faafeagai o le inoino (5)
59. se isi igoa o le isumu (4)
60. Faalupega: _ ma le Vaifanua (3)
62. o se ituaiga ‘ula Samoa (6)
65. E mapu i ai i taimi o puapuaga (7)
66. tane poo le ava (6)
67. laueleele (5)
68. punou toele (3)
69. uo a le faatoafaiava/faatoanofotane (2,4)
72. Suafa matai Eti Alesana sa palemia (7)

LALO ~ DOWN


1. se ituaiga maa; apa e ave ai le lefulefu e tape ai a’a o vao (6)
2. “E au le _ a tina” (7)
3. O le vaomatua aupito tele lalolagi (7)
4. Tusi Paia: (Ruta 1) igoa to’alua o Ruta le tama a Naomi (7)
5. Faafeagai o ‘i sisifo’ (1,5)
6. Faauma le fuaiupu: Ana le _ le Alii (6)
7. i’a aupito lapo’a i le sami (6)
8. e faimalaga ai (7)
10. tautalaititi, faitala i tala a tagata matutua (4)

PASO SAMOA TAALOGA MAUA LE TAU TUPE \$100

- 11. tu ma aga a papalagi (11)
- 12. moe a tulafale Samoa (5,6)
- 13. igoa o se faletalimalo sa mua'i faaigoa o le Kitano Tusitala (5)
- 21. foi i le mea na sau ai ((5)
- 22. se nuu i Salafai ola ai le moli (6)
- 24. tomumu (3)
- 25. malaga ai i le sami (3)
- 26. mea'ai fai i i'a mata (3)
- 27. Kalama: faailotaimi veape nei (1,3)
- 28. ua uma (4)
- 28. atunuu nonofo ai Singh ma Patel (6)
- 31. Taea o le lotu (Metotisi) (5,2,9)
- 35. malosiaga niukilia atoma e fau ai (7)
- 36. Tusi Paia: le tupu o Suria na faatonu e Elia e tofu faafitu i le loritana (7)
- 37. e pau mai ai (4)
- 40. e mitamita ai (3)
- 41. e o'o atu i ai (2)
- 42. faaali nifo (2)
- 46. musika: e feula (2)
- 47. taumafa (se isi upu) (7)
- 48. nofoilo (se isi upu e tutusa uiga) (7)
- 50. pule e afua mai i le temokarasi (3,5)
- 51. Ua _ malo ua maua (4,4)
- 52. igoa o le afaipese iloa ai le nuu o Satupa'itea (7)
- 54. Pese: Tiama'a igoa o se teine (3)
- 56. Tusi Paia: igoa o se fili o Israelu (5)
- 60. se afioaga i Salafai e iai le tala ia Funefe'ai (6)
- 61. Ua iai uma tagata o le fono (4)
- 63. Igoa o se siva Maori (3)



- 64. O i'a ua afifi ma tao i le umu (3)
- 70. Faalupega: Aiga faalagilagi (5)
- 71. iloga ona ila i amioga a se tasi (6)
- 74. Taua: vaega e pito luma o se 'autau (5)
- 75. Pese: Fai mai o lalo lava o le _ , i tala ane o le fale vali e (5)
- 76. Tusi Paia: o le soo alofaina (5)
- 77. Pese: Ua _ la'u ipu, talu le tu'inanau (6)
- 82. Tusi Paia: Nofoga o le faasalaga: Afi ma le _ (4)
- 83. igoa Eleni o se teine (5)
- 84. se alalafaga i Amerika Samoa, amata i le V (5)
- 86. fai ifo le vai poo le fula (4)
- 87. o se ituaiga ola fagota (3)
- 90. ta'u masani o le tatau a alii (3)
- 91. faalogona ese i le tino e fefe ai (3)
- 92. vala'au leotele (2)




TALI PASO SAMOA LOMIGA 5-6-7-8 2024

F	A	A	U	T	A	T	A	U	M	A	N	U	U	L	A	M	A	L	U	A	
O	U	A	P	T	O	A	I	I	A	E	S										
F	A	A	L	A	V	E	L	A	V	E	T	A	L	A	F	A	A	S	O	L	O
O	U	L	T	L	M	A	A	E	A	A	L	F									
G	A	F	A	O	T	A	V	I	T	A	P	A	L	E	N	I	L	E	U	A	
A	A	L	N	I	I	S	U	E	O	F	O	R									
A	A	U	T	O	V	A	A	F	I	T	A	A	F	A	A	P	E	A			
A	O	A	S	A	U	L	U	P	O	M	O	L	F	O	I						
T	A	L	A	L	U	M	A	T	T	I	V	A	T	E	U	L					
E	A	A	A	A	F	A	U	U	L	A	T	A	N	A	L	E					
N	U	U	S	U	A	T	I	A	M	U	F	A	P	A	O	I					
A	L	L	U	G	A	U	A	I	A	P	O	T	O	O							
I	M	A	K	U	L	A	T	A	L	F	A	T	U	A	T	I	A	N			
O	I	E	O	F	U	A	O	L	O	I	U	R	O								
S	A	A	M	A	T	I	V	A	T	T	O	S	U	A	F	O					
N	A	E	F	V	T	U	U	P	O	A	T	A	U	I	S	O					
F	A	L	E	L	A	U	A	S	I	A	S	A	S	A	O	L	A				
A	I	A	U	E	I	F	L	O	A	F	U	I	U	P	U						
L	E	M	A	U	A	T	U	A	F	U	T	A	P	A	F	A					
E	A	L	I	M	I	A	O	O	F	A	A	E	E								
M	A	L	A	E	O	F	A	A	U	T	U	G	A	T	A	G	I	O	P		
A	A	V	O	L	I	I	O	I	A	S	A	O									
I	P	U	V	A	I	F	O	F	O	G	A	F	E	T	A	L	A	I	E		

TALI PASO 10—LUA GAGANA

I	N	S	I	D	E	S	T	A	R
N	I	E	A	A	R	O			
S	A	N	D	B	L	A	C	K	S
T	G	A	L	K	E				
R	E	L	A	T	E	R	Y	E	S
U	E	T	C	O	G				
C	D	T	R	Y	S	H	O	T	
T	P	A	U	A	O				
B	L	A	C	K	B	I	R	D	
A	O	T	E	P	B				
P	O	T	S	F	R	O	S	T	Y

Copyright reserved ©LPS TAVITA



SOLO



Tusia

Max Ehrmann

Feagaiga a le ola

Savali lemu i totonu o le pisa ma le vevesi, ma e manatua le filemu o i le pau taaligoligoa.

Ia fealofani ma tagata uma i le sa'olotoga e te lavatia.

Faaleo lemu ma manino lou faamaoni, ma e faalogo fo'i i isi; auā e o'o i le vale ma le tufanua e taua fo'i a laua tala.

Alo ese ma tagata leoleoā ma faamimisa, O ni faasoesā i latou i le agaga.

A e faatusatusa oe ma isi e au ina tupu ai lagona fuā ma le loto tiga; auā o iai pea ē e maualuluga ma maualalalo i lo oe;

Aeae i au taumafaiga ma au fuafuaga; fiafia i le tofi ua e galue ai po o le a lava le faatauvaa; o lou lena e te toomaga i ai i suiga o le olaga.

Faautauta i au faiga pisinisi, auā e tumu le lalolagi i maili. Ae 'aua fo'i ne'i galo ia oe uiga lelei o isi; E to'atele i latou e ausi i ni faamoemoega sili; e tumu fo'i le olaga i tausinioga o le lototele.

Ia e faapei o oe; aemaise, 'aua e te faatagā alofa. Aua fo'i e te melea le alofa; auā i le tau o to'atugā ma puapuagā, e tumau lona anagatā e pei o le mutia.

Ia e talia le tima'i a auga tausaga ma e faamatuu atu aga faatama iti. Atia'e le lototele e puipuia oe 'ai popolega vale.

Aua e te faatiga ia te oe i mafaufauga le aogā. E tupu le atuatuvaale ona o le le gaoioi ma le nofo to'atasi.

I tala atu o se soifuaga taupulea, ia e ola faapalepale, O oe o le tama a le foafoaga, e le ese ma la'au atoa ma fetu; e iai lau aia tatau iinei. Po ua manino pe leai fo'i ia te oe, o loo fa'aalia i lou soifua lona matalasi.

O le mea lea e ao ai ona lua lelei ma le Atua Poo le a lava sou taofi ia te ia; o a fo'i ni lavasiga ma ni faamoemoega 'ai totonu o leo fetotoa'i o le olaga, a ia e 'u'u mau le filemu i lou loto.

E ui i ni mea faafoliga, ni le atoatoaga, ma ni miti nutimomoia, ae e aga pea i luma le olaga.

Taumau i le fiafia, ma e soifua tausaaafia.

faaliliu LPS Tavita

FAASOA FAAPITOA: SAUNIA DR LPS TAVITA

E le utufia le uaina fou i fagupa'u tuai. O se va'ai faa-Samoa i le tofa manino o le fuaao faaleaganuu ma ona luafesasi.



Folasaga Tomua:

O lenei pepa o se iloilogia i le tulaga o le pule ma ana faia i totonu o Samoa. Ma e aga'i tonu se matau toto'a i le va'ai faa-Samoa i le mau faatofa manino a le alii su'esu'e o Antonio Gramsci, o ia e ana le upu 'fuaao faaleaganuu,' pe i le gagana Peretania, cultural hegemony.

Ua iloa le malosi o le tatou aganuu o se ta'ita'itama ma se ta'iala i soo se vaega o lo tatou olaga o se nu'u. Pe i upu a se fatusolo, Tatou te manava ai, ma gaoioi ai ma avea foi o se auala e soifua ma ola ai. E le fesiligia, o lo tatou tofi tuufaasolo mai tupulaga ma tupulaga, ma o loo fa'aaauu pea e i tatou foi. O lena malosi o loo molimauina pea ia tatou talanoaga faalenuu. E pei o lena e faapea mai, e malu le lotu ona o le aganuu. Ae fai mai fo'i le lotu, e le tau soaina le talalelei e se isi malosi. E faapena fo'i aga o talanoaga i le va o le malo ma pulega a alii ma faipule i afioaga.


O lenei la folasaga ua taumafai ai e faatu ni fesili i le faamaoni o sea mau poo mau, e iai le fesili autu lenei, Poo fea tonu o ta'oto ai le pule, e fia pule i Samoa, ae faapefea ona tatou fa'aaoga lenei pitofilo faalemalo a Gramsci e faamatala ai mea moni o loo tutupu, o nisi mea e lilo i le tatou va'ai masani?

I le tali atu a le faipepa i le finauga e faapea, E iai molimau e faamaonia ai le mau a Gramsci i le fuaao a le tatou aganuu. Peita'i e ao ona manino le tulaga lea, talu ai ua avea le aganuu o se tapu e le fesiligia, ua mafua ai le le matua manino i lena pule ma ana faia, poo ni tali 'anoa i fesili sa ta'ua. Auā o le fesili e gata ai fesili i nei aso o faigamalo temokarasi, O le a le pule? O ai tonu le pule? O ni vala nei o le a taumafai le faipepa e asia, ae tauluga i la'u mau e fia faamautu, e faapea, e tulaga ese lava le fuaao faa-Samoa mai isi fo'i nuu ma a latou fuaao.

Upu autu i gagana e lua:

fuaao faaleaganuu – cultural hegemony, fuaao – hegemony, faavaagalue faapitofilo – theoretical framework, tofa manino – philosophy, pitofilo – theory, atagalua – model, faamalo – political, upufai (o malo) – politics, Pitofilo o le Tofa Fesili – Critical Theory, su'esu'ega – research/study, Pitofilo o aga fesilisili – postmodern theory, faavaa – context, taofisā – ideology, pulega – governance, vala – juncture, oloa faaleaganuu – cultural capital.

A o le'i folasia se manatu, ae muamua lava ona faailoa atu le lisi o upu o le a ou fa'aaogaina. E taua lea mo le manino, o nisi o upu atonu e fou i le faafofoga. E le o po se lilo, o loo atia'e pea a tatou fo'i upu, pei o le pitofilo mo le theory sa ulua'i faailoa mai e Aiono Dr Fanaafi Le Tagaloa. E faapena le tofa manino. O le upu taofisā ua ou fa'aaogaina e soa ai le ideology. O le upu fuaao ua ou fa'aaogaina e faatatau i se pule poo se



taupulega e le agaia e se isi malosi, e soaina le upu hegemony.

Folasaga Lautele

O le tete'e a le auaigaluega i le 1981, le nunu faaupufai i le 1982, na fagua ai i tatou i le ma'ale'ale o lo tatou si'osi'omaga, le faafuase'i e o'o i ai suiga o upufai pe a lugaluga le tau. E faapena fo'i i le mataupu o le 2021, ua silafia lava, ma o na uma e molimau i le vave ma le faafuase'i ona liu le tai, ma toetoe ai e toe alo lo tatou vaa i tua, i na fatia o taua ma fevaevae'iga.

E molimau le talafaasolo i Taua a Aiga o Samoa, afua mai i le 1848 e aulia mai lava le 1889. Faapena foi taimi o pulega a papalagi. O le fesili, aisea le vevesi i na fatia, ae o'o mai ia tatou tupulaga ua le faapena? Moni e vevesi i upu ma tala ae o loo to'a pea le tai? Vevesi mai Fiti, Papua Niu Kini, Toga, Solomona, maliliu tagata, a o loo mau pea le toovae a Samoa. O le a le mealilo i 'i? Ae faapefea ona faamatala?

Lona lua, i le tula'i mai o le malo poo le setete o se pule e ta'imua i upufai o Samoa, ua tofotofa ina ai le tulaga o ana faia, poo le nofoapule i totonu o Samoa. Mo se faata'ita'iga o le tula'i mai o le HRPP o se faigamalo malosi. O lena malosi e molimau i ai lana fuaao i isi vaega faaupufai ma pulega mo se taimi umi.

I lena agaga fia malamalama na afuafua ai so'u taofi, e mana'omia se meafaigaluega lelei, se tioata su'esu'e e manino ai le tilotilo i mea o loo tutupu. O lea na ou filifilia ai le faavaagalue faapitofilo ua ou faaigoa, o le Pitofilo o le Tofa Fesili. E le o se aga e masani ai la tatou aganuu e fesili, pe fesiligia le pule i ana mea e fai, ae manatu fo'i e le 'alofia le tulaga o tapulaa ma tulafono o su'esu'ega faaonaponei.

O la'u faavaagalue e le feteena'i ma le pitofilo

o aga fesilisili (postmodern) ae femolimaua'i. O na tu faalesu'esu'e e maua ai i totonu ia tofamanino a ni alii faitofa se to'atolu - Michel Foucault, Pierre Bourdieu, ma Antonio Gramsci. O nei alii su'esu'e ma a latou galuega, e le nafataulima i lenei pepa faatauvaa, ae ua na o ni vaega taua ua fa'ifa'i mai o a latou tofa manino, e fai ma molimau. O lenei pepa e faavae mai i la'u su'esu'ega mo le tusipasi o le foma'i tofa manino, pei ona ta'ua. Ma e maua se ata atoatoa o la'u galuega, i luga o le uepaga tafailagi www.ola888.com.

La lea ua mautu atu la'u mafua'aga i le su'esu'eina o le mataupu, o le a taumafai loa e saili se tino o le autu e feauga ma le sini o lo'u faamoemoe.

Muamua lava o le upu pule, ona o le fatu lea o le faasoa. Talitonu ua nofoilo le aofia i lona uigalasi, ae e fia tata'i le faafofoga i lona fa'aaogaga i upufai o malo, i le faavaa o pulega faatemokarasi ma sa'oloto. Ua malosi le ta'a'ina a le Igilisi i le upu power ma lona fa'aaogaga faalētatau, ua tau galo ai le va'ai faa-Samoa lava ia i le pule o se mea lelei, e faia tonu lelei ma ni suiga lelei. O se faamanatu lea a le faipepa a o fa'aaauu le tautalaga.

O le pule i le va'ai faa-Samoa pe faa-Polenisia fo'i, o se vaega lava o le ata atoa, e le o se totino e tu ese mai ae o se malosi e lotolotoi ai i le moa o se faiganuu poo se sosaiete. E iai e pule o le nuu, i o latou tulaga ma faavasegaga faaleaganuu. O alii ma faipule e faia tonu o soo se mataupu lava, e le faigata le faata'otoga o le pule ma ana faia i lo tatou si'osi'omaga masani. Ae na luagia lena pule ina ua ofi mai ia pule fou, i faigamalo faakolone a malo malolosi, faapena fo'i le pule faalelotu Kerisiano ma le temokarasi. Ma i nei aso o le tula'i a'e o vaega faaupufai, ua

FAASOA FAAPITOA: AGANUU MA LE TALALELEI

matauina ai fo'i ni suiga, aemaise i le galuega faamaopoopo e o faatasi ma le pule. E pei a o le upu, o le lou ma lona fuata, lenei e foliga ua fai e vaega faaupufai le galuega o le faamaopoopo, sa fai e Tumua ma Pule ma Aiga o Samoa. Ae faapitua i le tula'i mai o le malo e ta'imua i le faasoaga o lena pule.

A matau toto'a la aga o le pule ma lona feliu'iga mai lea taimi i lea taimi, e iloa ai le tulaga o se faiga su'ifefiloi. O le pule auliuli sa iai a o lei taunuu isi pule mai fafo, ua liua lona auliuli i se na tuu'aulafoga, e tula'i mai ai se isi auliuli fou, i se laasaga faagasolo. Lenei la a talanoa i le pule a le malo, e le mavavae esea ma lana faia faaleaganuu, auā o minisita ma faipule o ni matai fo'i faaleaganuu. E faapena fo'i i lana faia faalelotu, auā toe o tagata Samoa uma e lolotu pe talitonu i le Atua.

O le minisita ma le faipule o ni sui lava fo'i o a latou ekalesia ma mafutaga tapua'i. I nisi upu, e fetāla'i ma fesoota'i le pule Samoa, e feuluulua'i ma fesaua'i ma feaiaa'i.

Lona lua o upu ou te fia faamanino mo lenei pepa, o le aganuu. E tutusa lava nei upu e lua, pule ma le aganuu, e tafalasi o la'ua uiga poo faauigaga. Ae talitonu tatou te autasi i le faamatalaga faavae ma faigofie, o se faiga e soifua ai ni tagata poo se nuu, ia latou tulafono, aga fealoa'i ma tu masani. Tatou te autasi foi e le tumau se aganuu ae fesua'i pea ma aga o le taimi ona o le poto ma le malamalama e tupu pea. E ao fo'i ona tatou sauniuni i suiga e tula'i mai ai.

I le faauigaga a le alii faitofa ia Gramsci, o loo ia fa'aaoga ai le upu aganuu o se faiga e tupu pe iloa i malo faanonaponei, o na e fefiloi ai tu ma aga tuai faatasi ma tu ma aga fou. Mo se faata'ita'iga o le tulaga o Samoa, e fa'aaoga le temokarasi i ana tonu fai atoa fo'i ma le soalau-pule faa-Samoa. O le uiga lena o le aganuu o loo fia faataua mo lenei pepa, o se upu e taaofa'i uma ai le si'osi'omaga Samoa i auala o pulega fou faatasi ma pulega tuai.

O le fuiupu 'fuaao faaleaganuu' e faatatau i lena malosí'aga lē agaia o se aganuu faapea. Ma i le taofi o Gramsci, o se malosí'aga lenei e le 'alofia e se isi, ae mafai fo'i ona fa'aaoga mo le manuia o tagata uma.

O le a ou talanoa loa i le upu 'luafesasi.' Ona pau lea o le tatou upu e tau felata'i ma le Igilisi, dilemma. O loo faapea mai le tusiupu o le upu 'dilemma' e faatatau i se tulaga faigata e omia ai se tagata i le va o ni filifiliga se lua. Sa fa'aaoga e Tupua Tamasese lea upu i se tasi ana pepa, e faamatala ai le tulaga laufetoa'i o pule i o latou tua'oi. O le fesili, o fea e vase ai le tua'oi o le pule faalemalo ma le faalelotu ma le faaleaganuu fo'i? O le tali e le faigofie. Auā o le taofisā e faapea, o Samoa o le aiga, ona o le aiga, e le faia e le malo se tonu e afaina ai le lotu poo le aganuu. Poo ai lava e ana se tapu, poo le aganuu poo le lotu, e tataua ona amana'ia e le malo.

Faapena fo'i tapu a le malo e tataua ona amana'ia e isi pule e lua. Mo se faata'ita'iga, o le tapu o le lafoga mo faife'au. Ua tele tausaga

o faamamalu e pule uma e tolu, se'ia suia lena e le tulafono a le malo na se'i mavae, ma faamalosia fo'i lona faatinoga. O se suiga e manatu se vaega o le itupa a le lotu ua sala ai le malo i le va fealoaloa'i. E le na o se va fealoaloa'i, auā i le vaai faaleaganuu e taua feagaiga i aiga. O le luafesasi tonu lea, i le mau eseese i le faatinoga o le pule faanonaponei, avea ai le malo ma faatonu sili. O le malo e tu mo le faamautuina o tapu faapulega malo temokarasi, e ave ai le faataua i le ola tutusa ma le le faailogaina o se tasi poo se ituaiga.

E fetoa'i lea ma le aganuu e manatu e iai tapu e le o'o i ai le pule a le malo. E pei o le faatauaina o feagaiga poo faifeau. Aemaise lenei, o taofisā a se nuu e iloga le faatauaina e tagata lautele. Ou te fia aumaia se mea na tupu, o loo o'u ta'uina i la'u galuega, i le va o le lotu ma le malo. I le 1976 na fuafua ai se atina'e a le malo e a'afia tonu ai eleele o se tasi ekalesia. Talu ai e le na o se eleele a o se nofoaga e taua i le ekalesia, o lea na le faigofie ai ona faamatu'u atu i le mana'o o le malo.

E tusa ma molimau o lena mea na tupu, e au ina vevesi pe 'ana leai le tofa mamao ma le faautaga loloto i itu e lua. Ae o le uiga o sa'u faamatalaga, e iai tapu faaleaganuu e le fo'i ai se tagata i lona puipuiga ma le faamamaluga. O le fesili, Aisea e faapea ai? O le tali, o le finagalo lea o tagata. Tagata lotu, tagata o le aganuu, a o tagata fo'i o le malo o Samoa. O le fesili, E faafelea la tapu o le tulafono o loo tausia e le malo ma le faamasinoga?

A tatou tilotilo teisi i tua atu o lo tatou tala, ona manino mai lea o aga o lena pule faalemalo, aemaise i faigamalo kolone, na to'esea ai ni vaega eleele mai afioaga ma tuuina atu i le pule a le malo. E faapena le pule faalelotu i eleele sa foa'i e aiga ma nuu i le lotu. O na foa'i sa faia lava i upu, ma sa tuu'autapu tua'a i le tausiga o na feagaiga. O nisi o na eleele ua toe faafo'i atu i tagata ma nuu e ona, e faamaonia ai, e mafai ona fetuutuuna'i le tofa i le tausiga o tapu mai lea taimi i lea taimi.

O le mafauaiga e faapea, o le mea ua tala-feagai ma le mana'oga o tagata mai lea tupulaga i lea tupulaga. Ona ua fa'aopoopo le numera o tagata, ua talafeagai ai le toe faamatuu atu o latou lava fanua ma le pule ia i latou. O le tali la i le fesili pe mafai e le malo ona fa'aaoga faamalosia se mea totino a se isi pule. O le tali, e mafai i lalo o le pule lē agaia a le tulafono, ae e iai lona. Auā afai sa mafai i ona po o pulega a papalagi, ua le o toe talia gofie i nei aso o pulega malamalama, o lea fo'i ua faafo'isia le mamalu o pulega faa-Samoa, e faamua ai le tausiga o le va fealoa'i.

E molimau lava le talafaasolo, i le tete'e a Samoa e pei ona iai le Mau a Pule ma le mau o le tuto'atasi; auā pe fai mai o tapu o le faamata'u, ae le'i fo'i ai; faapea fo'i le tete'e a se ekalesia i le fuafuaga a se faigamalo e fa'aaoga so latou fasi eleele. Ae faapea le tete'e a le aufaigaluega i le 1981, le tete'e a se ekalesia i le mataupu i le lafoga e fai i le malo. E ta'u mai ai, e iai taimi e fesopoa'i ai pule i tua'oi o tapu o le

va vealoaloa'i, pe a faataumatatao. Aisea e faapea ai? O le tali a lenei pepa, e mafua fetoa'iga poo ni luafesasi ona o aga o le pule lava ia. Ui ina aliali i luma le pule a le malo, pulega faamatai, ae iai fo'i pule e taule aliali i luma a o loo iai lava, e iloga la latou pule i loto ma mafaua o tagata. E pei o le lotu, i lana pule faalelotu ma lona tulaga amana'ia i totonu o le aganuu ma le malo foi.

O tagata lotu o latou lava o sui o le lotu i le malo ma ona upufai, i faiganuu ma soo se pulega faanonaponei. E mafua ai se taofi o lenei pepa, e tafatolu le nofoapule a Samoa. Muamua, le malo. Lua, o le aganuu, ma le tolu, o le lotu—ma isi pule na afua mai fafo, ua avea lava ma totino o le pule Samoa i nei aso (taga'i i le ata i luma).

FETI'I O LE NOFOĀPULE SAMOA TUTO'ATASI

O lenei nofoapule o le atoali'o lea o la'u faatatau i le upu, fuaao faaleaganuu. Lona uiga ua le pumoo se faauigaga o le upu aganuu ae o se milosaga o ni pule se tele. O lea ua ese mai ai sa'u faauigaga i na a isi su'esu'ega e vaevae le pule i ni vaega se lua, o le malo (state) le tasi itu a o le pulega faamatai le isi itu. O la'u mau, e iai le pule fou, i le lotu ma le 'aufaasalalau, ma isi, e ao ona faitaulia, ui ina tau le iloa atu sa latou pule i tonu fai o le malo.

O nei uma pule ua mafai ona nonofo faatasi e mafua i lo latou lagolagoina o taofisā mai tua'a anamua, ma talia fo'i e le puletua ia le ta'ita'iga a e ua umia le pule.

E pei ona ou ulua'i ta'ua, e to'atolu ni faitofa i le mataupu i le pule na ou nonofo mai ai ia latou tofamanino. O le a ou taumafai e aotele atu ni o latou sao i lenei mataupu, ae faapea ni aoga i le tatou talanoaga faalenuu.

Muamua le alii faitofa ia Foucault. Faapea mai o ia, tatou te maua le pule i sootaga ma mafutaga a tagata. E leai se pule e tuto'atasi, pe tino mai i se tagata se tasi poo se pule se tasi, ae pei o le vai e feulua'i ma feliu'a'i i foliga e tele. E atoa le pule. E pei o se aiga i ona sootaga ma faia, a leai le tina e leai tamā, a leai le fanau e leai tamā ma tina. A fa'aaoga le mau a Foucault, lona uiga e le vavae esea le tautua mai le pule, e pi'i faatasi. E peisea'i e fai mai, e pule uma oulua. Pe faapea fo'i, o tagata uma o tautua a le pule.

Atoa fo'i ma lenei, e leai se pule poo sana faia e ta'ata'a mamā. E mafua ai lana upu, 'all social relations are power relations,' 'o faia uma faaletagata o ni faia faalepule.'

Lona lua, le alii faitofa o Pierre Bourdieu, i lana mataupu o le oloa faaleaganuu ma faalenuu; faaleaganuu e faatatau i o tatou tamaoiga i agavaa, tomā, tulaga faalupe ma tofiga i totonu o a tatou mafutaga ma taupulega; faalenuu e faatatau lena i le tamaoiga o tu ma aga taualoa e iai le avafafata ma le tausiga o le va lelei, mo ni faata'ita'iga. O lē e iai mamalu, tofiga, le poto poo le tamao'iga i tupe ma meatotino, o ia fo'i lena e umia le pule. O pulegamalo, o faatusa i latou o lena pule, faapea soo se pulega lava pe faalelotu, faalegaluega pe faaleaganuu foi.

O na vaega e lua i le taofi o Bourdieu, o loo aofaga ai le pule ma e le faigata ona iloa le faamaoni o sea taofi. E le na o tupe e iloa ai le pule, e iloa i le suafa taua poo se tofiga mamalu, ae o

FAASOA FAAPITOA: AGANUU MA LE TALALELEI.

faatasi ma measina faalenuu e iai le fa'aaloalo ma le amana'ia o ta'ita'i poo e ua tauavea na mamalu mo ni pulega poo ni mafutaga.

Sa ou ta'ua le suafa o Antonio Gramsci, i lana tofa manino o le fuao faaleaganuu. O le mau a Gramsci, ua tutu malo faaonaponei i faavae e filogia i taofisa ma auivi o pulega ma faigamalo tuana'i. Ui ina taulagi le temokarasi e faatino ai pulega malo i nei aso, ae a susu'e teisi a'e i luga le vala, e le fou le tele o mea o loo faavae ai.

O se faata'ita'iga, o le faavae o Samoa, o le Atua Kerisiano, ae i tua atu o loo tuu mai ai le tapuaiga a Samoa sa faafailele i ana tapu anamua ia Tagaloa ma atua o le fanua ma aiga. O matai o pulega anamua o loo fa'aaauu pea i pulega faaonaponei. O iai tulafono ma tapu a malo faaonaponei, ae taua fo'i a tatou tu ma aga fa'aaloalo o loo maopoopo ai nuu ma tausi ai le nofo lelei.

Aumai i le autu o lena faasoa, i le upu a le Alii Faaola, e tatau ona utu le uaina fou i fagupa'u fou, e mafua ai se taofi, na sui a tatou fagu teu uaina i le 1962, ina ua toe maua lo tatou sa'olotoga i pulega mai fafo. Fagupa'u fou o la'u faatusa i auivi o pulega faaonaponei. Uaina fou e faatusa i tu ma aga o pulega o loo ua tatou tausia ma soifua ai i nei fo'i tupulaga.

Sa ou ta'ua ia vevesi sa feagai ma Samoa, i nisi mataupu na iloga le si'isi'i ai o lagona e le o po se lilo. Ae sa mau lava le toovae. Faafia ona vevesi Fiti ma isi nuu o le Pasefika ae o loo mafai pea e Samoa ona faasaosao lona sa i matau. Ma ou te ioe fo'i faatasi ma isi, o se vi'iga lea o le aganuu a Samoa. O se vi'iga fo'i mo le talalelei ma le galuega a le lotu. O le fesili pe faapefa?

O la'u tali, e mafua i lena fuao faaleaganuu e pei ona ou taumafai e faamatala. O se fuao ua mafai ai ona fusia faatasi ni malosi'aga faifaulia, i le malo tuto'atasi temokarasi, le pule fou i le lotu ma na e iai le galuega faasalalau, atoa fo'i le pule tuai umia e matai ma Aiga o Samoa. Ua feutaga'i uma ai i le faasoaina o le pule.

E mafua ai so'u taofi, e tu ese mai le fuao faaleaganuu Samoa i fuao a isi malo, auā o Samoa e iai lana aganuu o le va, e lotolotoi i totonu o ana upufai, pe faalemalo, pe faalelotu, pe faaleaganuu. Ua avea ma taulaga o se pulega soofaatasi e malosi ma mausali. Ua tatou tilotilo ma matau aga o pulega a le tele o faigamalo i nei aso, i le fa'aaoga o le malosi faaletulafono e fofo ai faafitauli. I Samoa, e mulia'i taunuu leoleo, a ua galulue le pule a alii ma faipule e faafilemu se vevesi. O molimau na i itu lelei ma taua o le tatou fuao faaleaganuu.

Peita'i e le 'alofia, o le va fo'i lena o loo avea ma se to'atuga i lo tatou aga i luma. Auā a le lelei ona tausi e afaina le nofo lelei. E pei a o le aiga, e pisa pe a le iloa e le tagata lona tulaga pe faatamala i lona tiute. E avea fo'i lena nonofo faatasi ma auala e le sa'oloto ai le filigā ma le ma'elegā, auā e pao atu e le matua le laitiiti. Ma tulaga faapena. Sa ou ta'ua nisi o mataupu e a'afia ai ekalesia i le va ma le malo,

aemaise le taua o tapu e tausia le aganuu o le va mo Samoa ma ona tagata. A faatalale le tasi pule, e tete'e mai isi pule. I le gagana o nei aso, a le fiafia le 'aupalota i le malo, e fa'aali i la latou palota. A fiafia fo'i, e fa'aali lava i le palota.

I le tausia o le va, ua tatou mafatia ai fo'i, pei ona molimau ni sui auai o la'u su'esu'ega. Fa'aaoga e nisi le upu 'pologa.' Ma o se tasi lea talanoaga e tutasi fo'i, ui ina fesoota'i ma lena talanoaga. Pau lea, ou te talitonu ua iai i le pule le poto ma le mafaia e tineia malie ai le upu 'pologa' mai a tatou tu ma aganuu, ae sui le talanoaga i se tasi upu tausaafia.

Lona lua, o se popolega e tula'i mai ona o lena

E taua le va, e ogatotonu le va, e nofo le pule i le va, e sufi le pule i le va, e tausi le tulafono i le va, e le ina faavaivaia ai, ae atili faamalosi ai; e manuia Samoa i le va, e lamatia fo'i Samoa i le va.

Ma o le tulaga tutasi lea o Samoa mai isi malo, e avea ai lena fuao o se malosi'aga e mafai ona faaleleia pea, ae sili ai lena, o loo maopoopo ma nofo lelei ai o tatou tagata.

fuao faaleaganuu, e taofa'i ai tagata ma vasega o tagata i le ta'u, o Samoa o le aiga. Ou te le fesiligia le moni o le faitau, auā o Samoa lava o le aiga, ae e ono avea ma se faanoi poo se 'alofaga i le faataunuuina o tiute mo vasega o loo pito i lalo o le faasoa a le tamaoiaiga, poo le faasoa i mamalu ma tulaga taualoa, atoa fo'i avanoa mo e faasinoesea pe iai mana'oga faapitoa.

O sini mauululuga na o faiganuu, faigalotu ma faigamalo i nei aso, ia faaleleia tagata ma vasega ta'itasi uma, ae ina ne'i avea le ta'u o le aiga e musu ai e faaleo se lagona mafatia, ina ne'i afaina se finagalo, poo le ta'uleleia o le aiga. Pe faapea foi, 'aua le popole fua e le o se isi, e le o se matai, o le taule'ale'a. O se tasi popolega lea i vaivaiga o le fuao faaleaganuu.

Aotelega:

Ua lamalama faai le tautalaga, ae ua ou manatu e toe fo'i i le amataga o la'u folasaga, i le finauga poo ai le pule e sili. E pei ona ou ta'ua se taofi taatele e foliga e faasili ai le aganuu i le lotu. O le tali a nisi o susuga i failotu, e le tau faa-mamaluina le lotu e le aganuu, auā o le tala lelei a le Atua e molimau ia te ia lava. E iai fo'i le tofa manino e faapea mai, o le malo le pule i nei aso. Atonu e sa'o lea i nisi malo temokarasi ua vaivai ai le lotu ma pulega tuai, peita'i o Samoa e le faapena.

O le fesili la, Poo ai tonu le pule i Samoa. O la'u tali, e le o le malo, poo le lotu, poo le aganuu, a o lena soofaatasi o le nofoāpule i le malaefono o le va fealoaloa'i. O lena va e faatino ai le pule ma le tautua i le taimi e tasi.

O le filosofia a Samoa i le pule ua silafia lava, o le ala i le pule o le tautua. Ae e iai foi le isi ona uiga lilo e lei iloga ona faailoa, pe a liliu le faaupuga faapea, o le ala i le tautua o le pule. O lona uiga e le se muta'aga le pule, a o le auala e

tautua ai i upufai o nuu ma le malo fo'i. E femaliliea'i lea ma le mau a le alii faitofa ia Foucault, i le pule o se mea atoa – e fai le faiva o le tautua e ala i le faiva o le pule. O tatou uma o tautua a le pule.

Ae peita'i e iai le tiute o le malo i isi uma pule, i lona tulaga o le mua'au i le folauga a Samoa o se malo. O lena tiute e ta'imua ma faasinoala i le malaga, e le tasi ae lasi ona tafa. E iai le puipua o tofi, agaifanua ma talitonuga o ituaiga eseese. Faapena aia tatau a tagata uma e le faailogaina se isi. La lea e iloga se sao o le malo i le tapenaina o le va lelei o le nofoapule, ina ia mafai ona faataunuu ana fuafuaga mo le manuia o vaega uma, aemaise o i latou e leai ni pule pe le faifaulia i taupulega.

Upu faai'u:

I lena pepa sa ou taumafai e faamanino le uiga o le upu aganuu poo le pule e iloa ma le aganuu, e le pumoo, ae lautele ma loloto lona faauigaga. Pei lava o le faatusa o le faipule i le palemene, a o se matai fo'i i lona nuu, o se tiakono o lana ekalesia a o se tautua fo'i i lona aiga.

Sa ou ta'ua le luafesasi, o ni mea e le ma'alofia i lo tatou si'osi'omaga ona o aga fou o se aganuu fuao faaonaponei, ae e mafai lava ona faatonutonu, aemaise i taimi e to'ia ai le va lelei o le nofoāpule.

Ua mae'a ona filifili Samoa i ona ta'ita'i i le faiga e maua ai le nofo lelei o ona tagata, i totonu o se aganuu fou pei ona ou faamatala. O se ituaiga fausaga fou o aganuu fuao e talitonu i latou e lelei mo Samoa. O se fusiga o talitonuga, tu ma aga fefiloi ae faatonutonu e le faautaga poto, lautua i le alofa ma le va fealoaloa'i.

E taua le va, e ogatotonu le va, e nofo le pule i le va, e sufi le pule i le va, e tausi le tulafono i le va, e le ina faavaivaia ai, ae atili faamalosi ai; e manuia Samoa i le va, e lamatia fo'i Samoa i le va. Ma o le tulaga tutasi lea o Samoa mai isi malo, e avea ai lena fuao o se malosi'aga e mafai ona faaleleia pea, ae sili ai lena, o loo maopoopo ma nofo lelei ai o tatou tagata.

I lena lava itula o le talafaasolo o le lalolagi ma le vevesi o loo afaina ai tagata o Ukraine ma Rusia, Isaraelu ma tagata Palesitina, e molimau i le fuao a malo malolosi, aafia ai malo laiti, e saga manino ai le vaai i tua i mea sa tutupu i lo tatou tala faasolo.

E 40 tausaga o feagai Samoa ma taua i le va o ona Aiga ma Tama, 60 tausaga i lalo o pulega a papalagi, ma o se faamanatu taua i le le toe auga o fagupa'u tuai, o le pule e saili i 'au'upega ma le malosi faafitafita.


Ma ou te matua ioeina le tomatau a le Alii Faaola, e le aoga ona toe utufia le uaina fou i fagupa'u tuai, ae utu i fagupa'u fou, e faatausaogalemu ai (Mareko 2.22). O fagupa'u fou o le mafafau fuata'iina lava lea, ua toe foaina mai elemene aupito lelei ma 'anagata o le nofoapule.

Ma le toe faamanatu, o soo se uaina fou ma tofo lelei, e lē 'ona o mea o le asō, ae mafua ona ua luagia i toega o mea aupito lelei mai soligavine a tua'a o ananafi.

O le susuga i le faifaasoa, Dr Levi Tavita, o le Matuaofaiva i le Laumua o Su'esu'ega tau Samoa, i le Lunivesite Aoao a Samoa, Le Papaigalagala.



PASI ATU LA TATOU PULETINI I LE TOU A’OGA, AIGA, LOU TUAOI, AU UO, E AOGĀ MO LE FANAU A’OGA



Igoa: Isaac Newton

Aso Fanau: 4 January 1643

Ausiga: I lona sao i le Saienisi ma le Numera e ala i ona taofi su’esu’e Fetu: Kaperione

E le to’atele nisi e iloa gofie o latou suafa i le lalolagi o a’oa’oga ma su’esu’ega, tainane foi i le faitauga lautele. Faapea mai se iloiloga e aofia le suafa o Isaac Newton i le 10 pito ta’uta’ua a le lalolagi. Ae e tulagaese Newton ona o lenei. O nisi saienitisi e iloga i se tomaji poo se mataupu e tasi, a o Newton e matafelefele lona faiva. O ia o se faia’oga i le matematika. O se saienitisi i le vao mataupu e iai le Physics, e aofia ai malosiaga e pei o le vevela, malamalama, leo, eletise, maneta, gaoioiga, fausaga o le atoma. Ma isi faiva foi. Ae iloga lona ta’uta’ua i lana taofi su’esu’e i le kalavite. E iai le tala lausilafia i le ‘apu na pa’u ma faaosofia ai sona taofi i le malosiaga faavae o loo na pulea le lalolagi, ae faapea foi le vanimonimo ma atulagi o fetu ma paneta. O fesili i mafua’aga o le foafoaga ma le gaoioi o mea e afua ni o latou tali i sailiiliga a Newton. O ana su’esu’ega o loo avea pea ma faavae o loo limata’ita’iina ai le lalolagi i ana su’esu’ega ma galuega fai, e molimau i lona poto maoa’e.

O le tala ia Newton le tagata e tulaga ese foi; molimau tusitala i se alii e tele ona faafitauli aemaise i le va ma tagata. O se tagata maitaita ma le le manatu i isi, tele ai ona fili, ma lē fia faauoina e isi. E tusilima tusitala i lona tupuaga faigata o se tamaititi, malii lona tamā a o i le manava o lona tina, fanau le au, toe faaipoipo vave lona tina i se faifeau ma tuua ai o ia e tausi e lona tinamatua. Talitonu tusitala o lea tete’aga ma mātua na sua Newton e avea ma se tagata faigata. I lona olaga atoa e lei faaipoipo pe fai sana uo tamaitai. Ae ui i lea, e le fesiligia le amana’ia na avatu e lona atunuu ia te ia ona o ana ausiga mata’ina, iloa ai Peretania i le lalolagi. To’atele isi, e pei o Albert Einstein, na aiaina e ala i ana su’esu’ega. Malii i lona 84 tausaga.

ATINA’E UPU:

tauavamea (v) faama’ite se fuafuaga faapitoa i sona tulaga e faata’ita’i ai; ulua’i tapena se fe’au ina ia saofia lona faatinoga Ft. Ua tauavamea le matagaluega i le galuega o le tineia o le faama’i. Ft. 2. Ua mafua le iuga manuia o le galuega ona o le lelei o lona tauavameaina. Afuaga o le upu: Faaofia e le OLA Puletini A’oga mai le faamatalaga a Pratt–tauava.

Tulimanu a Pola:



E mua pea la’u faafetai i le Tamā i le lagi, i lou soifua ma so’u malosi ua tatou toe fesilafa’i ai i lenei taeao fou. Malo le soifua maua. Ae alo maia, o nai motuga’afa fo’i nei e faanofogofie ai le faafofoga.

E leai se mea na sili ona avaga i ai le faauta a Samoa i lena si’uvaiaso na i lo le tauvaga mo le su’ega o se tausala Samoa faavaomalo. O tauvaga faapenei e le fesoasoani i le ola faaleagaga o fanau, pe a pulea e lagona faumalo o le loto faapito ma le mafaufau vaapiapi. O latou na e leotetele i le faasoaga o taofi. O ai ua aulelei? Poto? Blah? Blah? Blah? O le iuga, e malo le faitala taufaaleaga ma le loto leaga, faia’ina Samoa, usuusu ai le fili o tamaiti.

Pau le mea na avaga i ai lo’u loto o le taamilosaga kilikiti Samoa o le Teuila 2024. O la’u lu’i foi lea i le matagaluega, fai se taamilosaga kilikiti a a’oga, o lea ua iai le tatou matagaluega fou o taaloga e faafoeina. O a’u ‘au sa tapua’i o le Fetuao a tamaitai mai Ti’avea, ma le Tanifa o le Vao mai Sili i le motu tele.

E mulimuli mai le lakapi a o le Kilikiti Samoa ua leva ona mago lona laei. Lenei ua talanoa i suafa o alii lakapi ta’uta’ua, a o taleni o le kilikiti e le talanoa lava i ai. E iai suafa sa ou faalogo i ai i le te’a, malumu ma le sapo, atonu e tusi ane e se isi se tusi e faamanatu ai latou nei. E foliga ua apoia le agaga o le taaloga e Samoa i nuu i fafo, alu a’i avea le Kilikiti Samoa ma se taaloga alumia faavaomalo. O ai na iloa pe alu a’i iu ina avea ma se tasi taaloga faitaulia o le Olimipeka.

Ma’eu le taupati mai o a’oga tausaga 12 ma le 13 i le faamoemoe o le NUS i le vaiaso na se’i tuana’i. O lana aso o le Aganuu ma le avanoa e talanoa ai ma faia’oga i mataupu a le a’oga, pe afai e ulufale mai i le tausaga fou. Fiafia si a’u uo faia’oga o loo iai, i le faatauaina pea e le to’atele o le fanau o le aganuu faapea le gagana Samoa. O le anava a le laumua o mataupu tau Samoa, ina saga faaleleia Samoa o le ofaga e mapu mai i ai le talavou Samoa su’esu’e o loo alala i nuu mamao.

O nisi o fuafuaga tuutumamao a le iunivesite e iai le tapenaga mo le faaofia o ana mataupu e vasaga ma fuataga a le SQA. E fesoota’i lea ma le sini o le taliaina o le tusipasi mai Samoa i isi nuu o le lalolagi. Taimi nei ua aulia se 10 ni iunivesite mai fafo ua saina feagaiga ma le NUS; ma avanoa ai e galulue faatasi i soo se vaega, e aofia ai le faatulagaga o tusipasi ina ia vasaga tutusa tatou ma na a isi atunuu.

Ua toe o se aga ona o’o mai lea o le fiva o le CHOGM e ufitia Apia mo se taimi. E o’o mai ai ma isi mea tatou te le mana’omia, e pei o faama’i pipisi e afaina ai le ola maloloina o fanau ma le atunuu. O lea foi ua fautuaina malosi ai e le Matagaluega o le Soifua Maloloina le tataua ona fai ia tui puipui o fanau i le misela ma isi faama’i ua toe feala mai.

O le faamata’u sili, o lena o faama’i e afua mai i Aferika, ma Initia. O le fe’au taua, ia faia mea uma e mafai e puipui ai fanau ma aiga. Ae lelei ona puipui muamua ave taxi, ma fanau o loo faatau mea i le maketi. Toe laga laga a’e lau punifofoga. Manuia.